



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliarvm Omnivm Generalivm Et Provincialivm Collectio Regia**

Ab anno CCCXLVII. ad annum CCCCI.

**Parisiis, 1644**

Qvintvm. Ex decreto luonis Carnotensis, libro primo.

**urn:nbn:de:hbz:466:1-15256**

I. sistere volumus, vt nullus audeat irritum facere hoc quod constitutum est, si in perpetua damnatione noluerit persistere. Si quis vero contra hanc regulam nostram, & contra sanctorum trecentorum decem & octo patrum, qui in Nicæno Concilio hoc constituerunt, temerarius præsumptor fuerit, & vterius oblationes de sacris ecclesiis auferre molitus fuerit, sub anathematis vinculo sit colligatus & condemnatus. Responderunt omnes, Fiat, fiat.

## QVARTVM.

*In Spiritum sanctum blasphemant, qui sacros  
Canones violant.*

Violatores Canonum voluntarie, grauius a sanctis patribus iudicantur, & a sancto Spiritu, cuius instinctu ac dono dictati sunt, damnantur: quoniam blasphemare in Spiritum sanctum non incongrue videntur, qui contra eosdem sacros Canones, non necessitate compulsi, sed libenter (vt præmissum est) aliquid aut proterue agunt, aut loqui præsumunt, aut facere volentibus sponte consentiunt. Talis enim præsumptio, manifeste vnum genus est blasphemantium in Spiritum sanctum: quia (vt iam prælibatum est) contra eum agit, cuius nutu & gratia sancti Canones editi sunt.

25. quæst. 1.  
Violatores.

## QVINTVM.

*Ex decreto Iuonis Carnotensis, libro primo.*

Quoniam quidam metropolitanorum, fidem suam secundum priscam consuetudinem sanctæ sedis apostolicæ exponere detrectantes, vsum pallii neque expetunt, nec percipiunt, ac per hoc episcoporum consecratio, viduatis ecclesiis, non sine periculo protelatur: placuit, vt quisquis metropolitanus infra tres menses consecrationis suæ, ad fidem suam exponendam, palliumque suscipiendum, ad apostolicam sedem non miserit, commissa sibi careat dignitate: sitque licentia metropolitanis aliis, post secundam & tertiam commonitionem, viduatis ecclesiis, cum consilio Romani pontificis, ordinando epi-

Concil. Tom. 3.

PP



scopos, subuenire. Si vero consecrandi episcopi negligentia prouenerit, ut ultra tres menses ecclesia viduata consistat, communionem priuetur, quousque aut loco cedat, aut se consecrandum præbere non differat. Quod si ultra quinque menses per suam negligentiam retinuerit viduatam ecclesiam, neque ibi, neque alicubi consecrationis donum percipiat, imo metropolitani sui iudicio cedat.

CONCILIVM ROMANVM I.  
SVB DAMASO,

In quo Ursacius & Valens Ariani damnati.

NOTA.

Agg. Con-  
cili.

*Concilium Romanum.*] In hac Synodo, Romæ sub Damasi pontificatus initio celebrata, Valens, Ursacius, ceterique manifesto Ariani damnati, totique orbi terrarum per literas pontificis denunciati fuerunt. Ita enim scribit Athanasius ad episcopos Africanos: *Sufficiunt quidem scripta Damasi comministri nostri dilecti, & magna Roma episcopi, ceterorumque tot numero ibi congregatorum, &c.* Et paulo infra: *Gratiam habemus & illius (Damasi) pietati, & ceteris, qui Romæ conuenerunt, quod Ursacio & Valente cum sociis suis eiusdem sententia eiectis, concordiam ecclesiæ conseruarint.* Hanc vero Synodum ante damnationem Auxentii Romæ coactam fuisse, ex verbis eiusdem Athanasii præcedentibus manifeste patet: nam prædicta epistola de Auxentio multa locutus, scripsit se mirari, cur studio & opera Damasi pontificis, cui de Auxentii hæresibus plura scripsisset, hæresiarcha nondum ex ecclesia eiectus & depositus fuerit. Illo igitur tempore, quo Athanasius pontificem de Auxentio condemnando per literas admonerat, hanc in causa Ursacii, Valentis, aliorumque Arianorum coactam fuisse, ex præcedentibus patet.

Tempus  
Concili.